



USAID
HUSI POVU AMERIKANU



REVISTA SITUASAUN – JUÑU 2017

ASUNTU NE'EBÉ PRESIZA TAU ATENSAUN

- ▶ Incidente Violénsia 107 Akontese iha Juñu no Númeru ne'e Konsidera Tun;
- ▶ Incidente 1 Liga ho Konsolidasaun Partidu Polítiku, Maibé La Rejista Incidente Violénsia iha Kampaña iha fulan Juñu;
- ▶ Incidente Violénsia Liga ba Grupu Arte Marsiál (GAM) no Grupu Arte Ritual (GAR) Tun;
- ▶ Feto Sai Hanesan Vítima Kontinua Rejista Ho Númeru Aas Liu Kompara ho Númeru Feto Hanesan Autór.

INCIDENTE VIOLÉNSIA 107 AKONTESE IHA JUÑU NO NÚMERU NE'E KONSIDERA TUN

Iha fulan Juñu, Sistema Atensaun no Responde Sedu (AtReS) rekolla incidente violénsia hamutuk 107 no husi númeru ne'e 44.5 % akontese iha Munisipiu Dili. Númeru ne'e mós konsidera tun kompara ho númeru average (*rata-rata*) husi fulan Outubru 2016 to'o Maiu 2017 ho incidente 136.6 kada fulan. Tuir monitorizasaun, númeru incidente iha fulan Juñu tun tanba razaun sira hanesan tuir mai:

- Governu komesa implementa ona Lei No. 5/2017 kona-ba Regime Jurídiku Relativu ba Pratika Arte Marsiál, Arte Ritual, Armas Brancas no Rama Ambon.
- Polísia Nasionál Timor-Leste (PNTL) ne'ebé halo seguransa máxima durante tempu kampaña, pasa revista ba transporte sira no intervensaun lalais ba aktu sira ne'ebé bele provoca sai konfliktu ka krime.

INCIDENTE 1 LIGA HO KONSOLIDASAUN PARTIDU POLÍTIKU, MAIBÉ LA REJISTA INCIDENTE VIOLÉNSIA IHA KAMPAÑA ELEITORÁL IHA FULAN JUÑU

Tuir dadus Sistema AtReS iha eleisaun sira liu ba hatudu katak, númeru incidente sa'e maka'as bainhira partidu polítiku sira halo kampaña. Maibé ba periodu kampaña eleisaun parlamentár 2017, iha fulan Juñu nia laran rejista de'it incidente 1 liga ho konsolidasaun partidu polítiku, maibé la iha incidente violénsia liga ho kampaña eleitorál (dadus fulan Jullu 2017 seidauk kompila). Incidente liga ho atividade konsolidasaun partidu polítiku ne'e akontese iha Postu Administrativu Vikeké, ne'ebé ema deskoñesidu ho tudik sona militante partidu na'in rua to'o hetan kanek todan bainhira sira fila husi konsolidasaun partidu nian. Atividade balun ne'ebé halo ona hodi kontribui ba pás no estabilidade ne'e mak hanesan:

- Partidu polítiku sira asina ona paktu unidade nasional ne'ebé fasilita husi Gabinete Presidente Repúblika no Rede Nasionál Prevensaun Konfliktu (RNPK) ne'ebé lidera husi

Total Incidente Violénsia iha Juñu 2017	
Munisipiu	Incidente
Aileu	7
Ainaru	1
Baukau	9
Bobonaru	3
Covalima	6
Dili	42
Ermera	7
Lautein	1
Likisá	4
Manatutu	3
Manufahi	10
Oekusi	6
Vikeké	8
Total	107

Diresaun Nasionál ba Prevensaun Konfliktu Komunitária (DNPCC) iha Ministériu Interior antes tama ba kampaña eleitorál iha loraun 20 Juñu liu ba,


- Socializasaun krime eleitorál ne'ebé halo husi CNE no Belun liu husi Sistema AtReS iha Postu Administrativu 16 ne'ebé deteta sai risku ba konfliktu, atu prevene krime eleitorál ka violénsia eleitorál. Programa ne'e hetan apoiu husi fundu USAID,
- Komunitade rasik iha konsiénsia atu kontribui ba estabilidade nasional, ezemplu komunitade iha Postu Administrativu Uatulari, Munisipiu Vikeké ne'ebé iha eleisaun sira liu ba la permite partidu seluk halo kampaña iha sira nia área, maibé agora sira simu partidu hotu hodi rona programa ne'ebé hato'o sein violénsia.

INCIDENTE LIGA HO GRUPO ARTE MARSIAL (GAM) NO GRUPO ARTE RITUAL (GAR) TUN

Iha fulan Juñu, Sistema AtReS rekolla incidente violénsia hamutuk 3 liga ho Grupu Arte Marsiál (GAM) no Grupu Arte Ritual (GAR). Númeru ne'e konsidera tun kompara ho númeru average (*rata-rata*) husi Outubru 2016 to'o Maiu 2017 ho incidente 11 kada fulan. Incidente liga ba GAM no GAR ne'e akontese dala 2 iha Munisipiu Baukau hanesan dala 1 iha Postu Administrativu Laga ne'ebé membru GAM provoca malu no asaltu malu, maibé la grave; no dala 1 tan akontese iha Postu Administrativu Vemasse ne'ebé membru GAM asaltu malu iha serimónia festa despedida, maibé la grave. Iha Dili akontese dala 1, iha Fatumeta, Bairro-Pite ne'ebé membru arte marsiál baku sira nia maluk no rezulta kanek kmaan. Númeru incidente liga ba GAR no GAM menus tanba PNTL no F-FDTL halo patrollamentu ho másimu iha tempu kampaña no mós implementa ona Lei No. 5/2017 kona-ba Regime Jurídiku Relativu ba Pratika Arte Marsiál, Arte Ritual, Armas Brancas no Rama Ambon no halo kapturasaun ba ema balun ne'ebé transporta sasán kro'at durante halo pasa revista.

FETO SAI HANESAN VÍTIMA KONTINUA REJISTA HO NÚMERU AAS LIU KOMPARA HO NÚMERU FETO HANESAN AUTÓR

Dadus sistema AtReS hatudu katak, númeru envolvimentu feto iha incidente violénsia menus liu, komparaun ho mane. Iha Juñu rejista incidente 7 mak incidente hahú husi feto sira no iha incidente 16 seluk, feto mak sai hanesan vítima ba incidente violénsia. Enkuantu mane hahú halo violénsia iha incidente hamutuk 87 husi total incidente 106 iha fulan Juñu no iha incidente 71, mane sai hanesan ba incidente violénsia.



PREVENSAUN NO RESPONDE BA KONFLITU

Atividade Prevenção de Conflito Ne'ebé implementa hosi Sistema Atensaun no Responde Sedu (AtReS)

- ▶ Bazeia dados monitorizaçãun incidente violéncia durante eleisaun prezidensiál 2017, rejistu incidente barak mosu iha tempu kampaña. Ho hanoin ida ne'e, ekipa AtReS organiza talk show iha TVTL iha loraun 20 Juñu 2017, loraun ne'ebé hahú kampaña ba eleisaun parlamentár 2017. Iha talk show ne'e Belun konvida Prezidente CNE, PDHJ no Komandante Operasaun Nasionál - PNTL hodi fó hanoin no mensajen ba lider polítiku, militante no comunidade Timor-Leste tomak atu halo tuir regra iha tempu kampaña nune'e mós iha tempu eleisaun atu prevene krime eleitorál no violéncia eleitorál.
- ▶ Bazeia ba dados incidente Sistema AtReS iha Eleisaun Órgaun Suku 2016 no Eleisaun Prezidensiál 2017, mosu incidente violéncia balun iha Postu Administrativu Tilomar, Munisipiu Covalima no Postu Administrativu Vikeké Vila. Incidente violéncia mosu tanba provokasaun malu no tanba votante balun seidak hatene prosesu eleisaun. Tanba ne'e, Rede Prevenção de Conflito (RPRK) iha Postu Administrativu Tilomar no Vikeké Vila servisu hamutuk ho CNE, STAE no PNTL halo socializaçãun prosesu eleitorál atu redús violéncia iha tempu kampaña, votasaun no depois votasaun iha eleisaun parlamentár iha Jullu 2017 oin mai.



Atividade Prevenção de Conflito Ne'ebé Hala'o Hosi Ekipa Programa Apoiu Polisiamentu Komunitária (PAPK)

- ▶ Atu redús incidente violéncia liga ba GAM no GAR, PNTL iha programa PAPK socializa Lei No. 5/2017 kona-ba Prátika Arte Marsiál no Arte Ritual Sira, Armas Brancas, Rama Ambon no iha V (kinta) alterasaun ba kódigu penal iha Bairro Beto, Suku Comoro, Postu Administrativu Dom Aleixo, Munisipiu Dili. Programa ne'e halo iha parte rua ne'ebé komesa ho socializaçãun iha loraun 09 Juñu 2017 no kontinua ho limpeza jerál hodi hamoos parede sira ne'ebé tau marka grupu arte marsiál nian no haloot atributu GAM nian iha loraun 10 Juñu 2017

Atividade Responde ba Konflitu Ne'ebé Hala'o Hosi Ekipa Klínika Aseu ba Justisa

- ▶ Atu hasa'e kapasidade konsellu suku sira hodi maneja konflitu liga ba rai, Xefe Suku no membru Konsellu Suku 10 iha Postu Administrativu Baguia, Munisipiu Baukau partisipa treinamentu Mediasaun. Treinamentu ne'e loke husi Prezidente Autoridade Munisipiu Baukau akompaña husi Administradór Postu Administrativu Baguia no Komandante Eskuadra Baguia. Treinamentu ne'e realiza iha Postu Baguia, iha loraun 22-23 Juñu 2017. Treinamentu hanesan mós realiza iha Postu Administrativu Bobonaru iha loraun 7-8 Juñu 2017;

- ▶ Iha loraun 07 Juñu 2017 fasilita mediasaun ba disputante na'in 2 ne'ebé hakesuk malu kona-ba rai privadu ida ne'ebé lokaliza iha Suku Debos, Postu Administrativu Suai. Liu husi mediasaun ne'e, parte disputante sira konkorda hodi simu malu tuir opsaun ne'ebé parte rua apresenta no ekipa Klínika ba Justisa ajuda parte rua hodi asina no dame malu.

DEZENVOLVEMENTU POLÍTIKA

Atividade Advokasia ba Desenvolvimento Política Governu Nian.

- ▶ Ekipa Traballu Seguransa realiza soru-mutu regular iha NGO AIFeLa, Vila Verde, Dili, iha loraun 4 Juñu 2017. Iha enkontru ne'e fahe mós relatóriu monitorizaçãun Sistema AtReS nian iha eleisaun prezidensiál 2017 no revista situaçãun fulan Maiu 2017;
- ▶ Belun halo parseria ho organizaçãun internasionál mak hanesan Fundasaun Azia, kria ona sistema Database Online ne'ebé foka liu ba repozitoriu - Library ba UNTL. Objetivu kria database ne'e mak bele ajuda no apoiu servisu ka atividade peskiza nian. Atividade ida ne'ebé Ekipa Database halo mak iha loraun 13 Juñu halo apresentasaun kona-ba dados ne'e ba Departamentu Centro Nasionál Investigaçãun Cientifika (CNIC) iha UNTL;
- ▶ Belun ho apoiu fundus husi CARDNO hala'o formasaun ba funsionáriu públiku husi Programa Nasionál Desenvolvimento Suku (PNDS) no tárjetu liu-liu ba feto sira ne'ebé servisu iha programa ne'e. Tópiku ba formasaun ne'e mak "ABILIDADE LIDERANSA no JESTAUN" hodi aumenta liu tan sira nia koñesimentu no treinamentu ne'e hala'o durante loraun tolu, husi 12 - 14 Juñu 2017 iha Salaun Luz Clarita, Dili.



KONA-BA REVISTA NE'E

- ▶ Revista situaçãun ne'e relata kona-ba asuntu xave relaciona ho incidente violéncia no tendéncia konflitu husi koleasaun dados monitorizaçãun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 275 iha Timor-Leste durante fulan Juñu 2017. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situaçãun ho lalais husi kontribuisaun dame ita hotu nian. Ami agradece no simu informasaun seluk ne'ebé bele klarifika ka update dados, liuhosi sistema AtReS.

Informasaun kle'an liu >> www.atres.belun.tl

- ▶ **Márlia Oliveira da Costa**, Jestor Sistema AtReS: bylah.belun@gmail.com
- ▶ **Laurensius Lein**, Especialista Prevenção de Conflito & Política: laurensius.belun@gmail.com